

# Mud Volapüka

Nüm 1

8 prilul 2016

---

## Volanuns

Nos nitedik ejenon in vol dü vig at.

## Bukemaboed

### Konot «Diabüls» fa hiel Robert Sheckley

Golölo ve el 'Second Avenue' (lael telid), hiel Arthur Gammet esludom, das del binon gudik, vo florüpik — no tu koldik, ab flifik e galikünöl. «Del dialik ad balädükön balädis surik» - esagom oke. Tö gul ela 'Ninth Street' (süt zülid) esexänom de pärunaveg.

Ed enelogädikom.

— Eloedom-li atosi? - yufan esäkom mitani. Utans bofik ästanoms tö yan miticöpöpa, logedölo beianis.

— Kis «eloedom-li»? — ebegesagom mitan peädik redalogodik.

— Utani in plögun. Enelogädikom.

— Balugo eflekom lü el 'Ninth', — mitan emurülom, — kluö-li?

Yufan mitana no eküpom, das hiel Arthur äflekom lü el 'Ninth' ud

älovegolön eli 'Second'. Äloegom, das utan enelogädikom dü pülatimil. Ab sinif kimik ad laidälön? If nunomöv dalabane: «Pökol», kluö-li? Ba man in plögun vo eflekom-la lü el 'Ninth'. Kiöpio pläo ekanom nepubön? Ab hiel Arthur Gammet no ädabinom tö el New York. Enepubom löliko.

Tö spad veriko votik, ba no tö Tal, jafäb, nemöl oki el Neelsebub, älogeton lullieni. Ninü lullien esüikon bos, kel nestipöfiko no baiädon disins onik. Me loget lezunik el Neelsebub älogeton uti, bi kod dabinon ad vutön. Äfelifädon yelis mödik pö sukam magivafomülas, sperimänts ko kebs e stöfs, lärnäm nenbukio bukas gudikün dö magivam. Valikosi, kelos ilärnon, eninükon ini töbid tuvemik bal, e kis ejenos mögädo? Diabül neverätik esüikon.

Fümiko, defs distöfik mögons. As sam, brad pidecöpöl de deadikan: bo, das fun no duton-la lü oksasenan, — kanos-li voiko lekonfidön gudiküni selanas? Ba bal lienas, kel jafon miedalieni lulliena, piliunon-la bosilo krugiko — atos binos vemo binälik. U vöds magivavoka pipronons-la me leod neverätik. Silab dobik te bal kanon jenükön miseki! Ab ga nosi mögos koräkön. El Neelsebub estuton lü flad gianik me jot, petegöl me kedotem redik, ed ejatükon joti votik me nuel dägik. Äsi ai pö bluv, göb onik, petegöl me spins, änokon gluni nefibiko.

Ab nemu edafanon diabüli seimik.

Ye jafäb pefanäböpöl ninü lulliena leno sümedon diabüli sevädik seimik. As sam, plifs livik lagöl at mida gedik... Ab nünods jenavik valik binons sagädanotik me nevelät okik. Kiosotik jinon jafäb susnatik, debon ad leigetön. Esüadon ati. El Neelsebub evügolükon

safis kovenikumo ed äninikon ad spetön, ven jafäb milag osagon.

Hiel Arthur Gammet äbinon tu pestunöl ad spikön. Änu ezivegom lü bür surik, ejuitom luti feinik göda gölik florüpik. Etridom su pavot tö vegatraväröp ela 'Second' ed ela 'Ninth' — e ... fädo epubom is. Nekreiliko, kiplado veratiko.

Töbo branölo, eprimom ad logetön ini fog densitik, fulüköl cemi, ed elogom mosti gianik ko kedotem redik; most äkropikon. Len on ästanon flad — fremäd dulongamovik mö mets kil. Most älabom göbi petegöl me spins ed äjatükon kapi me on, ed logis svinik kels älogetons lü Arthur. Arthur esteifom nebuikön spido, ab ekanom stepöm te step bal. Esienom, das ästanom ninü figur pizüliunöl me kret e dub kod nesevädik no äkanom dugolön lienis vietik.

— Ekö, — ejonon most redik, eropölo nepüki lätiko — anu pedafanol.

Jenöfö epronon vödis ebo votik, kelas tons nestipöfiko äbinon foginik pro Arthur. Too esuemom sinifi pronota. Atos no binos reidam tikas: äsvo Arthur itjäfidiko, fasiliko ätradutom de pük votik.

— Esäspetikon boso, — Neelsebub äfovon, ven no espeton begesagi de diabül, pefanöl in lullien. — In konäds valik lepükoy, das diabüls binons jafäbs jeikik mö mets lul, ko flits e kaps vemo smalik, e labons in blöt hog de kel skuts vata koldik jedons plödio.

Arthur Gammet esäjalom plöguni de ok: edfalon nilü futs omik asä solidot nenfomik luimiköl. Etikom das tikamagot jedama skutas koldik binon gudik. Cem äsümedon furnod glutik. Klotem gedik omik ya evidon lemödot gedik pelepedöl stofa e sueta.

Kobo ko tikamagot at, esüikon däläl mosta redik, lienas peliunöl

me kret kelis no kanoy dugolön, cema glutik — däläl valikosa.

Eküpom das in buks, gasesds e filmots heroed, kel äbinom pö stad bisarik, ai pronon: «Kniboyöd obi, atos no mögos!» u «Sülö, slipon ud ebrietikon ud efilienetikon». Arthur no äbinon vilöfik ad spikön nesiämi at. Balido, äsüadam, das most redik gianik no udigidon atosi, telido, äsevom, das no slipom, no binom brietik e lienetik. In vödabuk hielä Arthur Gammet no dabinons vöds zesüdik, ab ädasevom: slip binon din semik ed utosi, kelos loegom, binon din ebo votik.

— No memob, das in konäds mäniotoy tefü fäg ad säjalön skini de ok, — Neelsebub estöton tikodafuliko, logedölo plöguni äseatöl len lögs hielä Arthur. — Muadiko.

— Atos binos pöl, — ebeGESAGOM Arthur saidälo. Plak voba as ganetan surik eyufon ome anu. Arthur isötom kosikön ko mens alseimik ed tuvedön jenotis nekleilik valasotik. Kleiliko, most esteifülon ad süvokön diabüli. Fädiko edageton hielä Arthur Gammet ed äbüocedon das Arthur binon diabül. Zesüdos koräkön pöki suniküno.

— Binob ganetan surik, — älesagom. Most ekledülon kapi gianik okik ko hons. Bataflapon flanis okik me göb, dukötölo luti ko feif neplitik.

— Dunöf olik pö vol votik leno nitedükon obi, — Neelsebub ämuron. — jenöfö, lindifob bidädi diabülik olik.

— Ab kleilükob ore, das no binob ...

— Nos uvobedon! — Neelsebub emuron, nilikölo lü siem lulliena ed tulitikölo me logs zuniko. — Nolob, das binon diabül. E nedob eli *levobedot!*

— Levobedot? No binob ...

— Büologob vemo gudiko käfedis diabülik valik olikes, — Neelsebub elepükon, takedikölo ko steif gretik. — Nolob, leigoäsä nolol, das diabül, pesüvoköl me hestam, muton dunön vili bal magivana. Esüvokob oli ed nedob levobedoti. Steab degmil levobedota.

— Levobedot ... — Arthur eprimom dolöfiko, steifölo ad papladön tö gul fagikün lulliena, fagikumo dese most kel äbataflapon vemo me göb.

— El levobedot ud el stamar ud el stanerin ud el na-le-ag. Ats valik binons din ot.

«Spikon dö mon», — Arthur äsuemom stedölo. Vöds jargonik binons nesevädovik, ab leplüti pö kel pepronons no mögos pölacedön. Me vöd «levobedot», klülikö, panemon uti, kel gebon as völäd topik.

— Steab degmil no binon vemo mödik, — Neelsebub äprimob ko grin käfik. — Nemu pro ol. Mutol yubön, das no binon balan stupanas, kels begons nedeadofi.

Arthur efredon.

— If no ubaicedob-li? — esäkom.

— Täno, — Neelsebub ebegesagon, ed grin onik pezüpon fa prul glumidik, — osöton ad votafomön oli ed upladön ini flad at.

Arthur elogedon lü tuvemikot duologamovik grünik kel pluon geila ela Neelsebub. Flad binon veitik pö stabül e rovikon pianiko pö löp. Bisä most fägon nüjoikön eli Arthur ini flad, neai ukanom gesegolön ve fladahog. Ed Arthur leno dotom, das mist fägon atosi.

*Fövoti konota reidolsös in nüm sököl.*

# Sevols-li, das ... Barbadän



1) Nemi okik nisul Barbadän (el '*Barbados*') idageton ün yel 1536. Tüvan Portugänik hiel Pedro Campos ejokon tö nisul daetepis, de kels plans dolagons sümedöl balibs, klu enemom nisuli me vöd 'balibik' (el '*Barbados*' in Portugäpük).

2) Ün yel 1994 pö mäted el '*Shell Caribbean Cup*' ikobokömons kvips futaglöpädik ela Barbadän ed ela Grenadeän. Kvip Barbadänik äneodon vikodi ko buäd mö glöps tel ad golön ini pled sököl. Bü minuts 5 kü pled ufinikonöv stanäd äbinon 2:1, Barbadänans esedons



glöpi ini leyan okik. Bai noms mäteda, üf no binon vikodan, tim zuik pafümeton, e kvip kel sedon gölikumo glöpi ini leyan taanik binon vikodan ko prod 2:0. Minuts lätik tima ledinik Barbadänans ämutons galedön noe leyani okik abi leyani taanik, dat taan no usedön glöpi ini leyan okik. Mögädo kvip Barbadänik ekipon pledi jü tim zuik ed egaenon.

3) Barbadän panemon necalöfiko as «län fita flitöl». Fit at binon klur nisula e fümükon nemi okik — kanon stadön pö flit love vat jüä mets 400 ko vif mets 18 a sekun.



4) Lecif Barbadän binon Jireg Britänik, jikeli pladulon Guvan nisula.

5) Barbadän binon davedöp pampeluta. Ebo is balidnaedo ituvoy pampeluti, keli ün yel 1750 ibepenom hikultan Hughes.

6) Barbadän binon motedalän jikanitana jiel 'Rihanna'.





# Konotül

Hiel Joseph Louis Gay-Lussac (1778 — 1850) — kiemavan e füsüdavan gretikün se Fransän — iperom logi ün bal sperimäntas kiemavik okik. Balna bijop semik ijokom omi — godavan okkonfidik pivälöl ini soged elas "nedeädöfiks" Kadäma di Fransän yufü tegöp.

— No suemob, lio kanoy binön nolavan, labölo te logi bal! Kisi mögos logön me log bal?

— Mödikumi ka olik, — hiel Gay-Lussac egespikom, no ebluvölo. — As sam, logob logis tel olik, ab logol te logi bal obik!

# Lerät

1) Söl Anderson labom cilis tel, nemu bal utanas binom hipul. Liomödotik mögod das cil telid i binom hipul?

2) Söl Bergson labom cilis tel, nemu bal utanas binom hipul pimotoöl ün poszedel. Liomödotik mögod das cil telid i binom hipul?

3) Söl Svenson labom cilis tel, nemu bal utanas binom hipul pimotoöl ün vedel. Liomödotik mögod das cil telid i binom hipul?

Tuvedot: in nüm sököl.

Säkis, küpetis e lofotis aliks ä materis e volanuns nitediks kanols lüsedön lü penedabog [komunan@yandex.ru](mailto:komunan@yandex.ru).